


IYA, UNDONDELE AMIWA

 Kyawama, ine, akyo kyajinga Becky kasa akyangye kusemwa ne. Kabiji nanchi Na—Nalangulukile mba, “Kyawama, mwayukatu. . .” Amiwa—Amiwa najile nsanyi ya makoko, yapotwa koini. Kyawama, Amiwa najinga. . .Bapele jichikichi jami, ne kufwachikapo, mwamona, kabiji Nalipijile, ne jibwezha, kabiji Amiwa ne jipana, mambo Najinga na mali anengezhiwa kupotamo.

² Kabiji juba jimo byo twajinga na—na mbung’eno ya basopa. “Ami,” baambile mba, “ng’anyi we lubalala wajikutayamo kintu kiji byobya?” Mwamona? Aye—aye ntangi, mwayukatu, “Macent jikumi a kajo kakwiaula?” Nanchi akyo kimweka nobe kechi kiji na mutengo ku balongo bakwabo ne, mwayukatu. Bamo bamwiabo bapaine dolla umo, mwamona; madolla abiji a kajo ka mulajilo. Kabiji Amiwa napainetu monka mo kyajile.

³ Kyawama, Naambile mba, “Kyawama, pano, kechi kikebewa ne amiwa kupana ne. . . Kika kyo Nakonsha kuuba inge Najiletu, macent jikumi?”

⁴ Mr. Fields, wajinga walondejilepo pa bu supulitendati, waambile mba, “Billy, pana dolla umo, byonkabyo, pacheche.” Waambile mba, “Abyo bonse bashala byo babena kuuba.” Waambile mba, “Wafwainwa kulama kyokyo pamo.”

⁵ “Kyawama,” Naambile mba, “Amiwa—Amiwa kechi naji kuja ne kantu makoko, kabiji abyoy byo bandipilisha.”

Waambile mba, “Oo, kechi ibyo ne, kechi ube kyokyo ne.”

⁶ Kyawama, nanchi Nalangulukile mba, “Kika kyo Nakonsha kuuba nakyo?” Pano Amiwa nalipijile macent fifite a kajo kakwiaula. Nanchi Natolele macent foote a bibye, inge Nakonsha kukeba kupotapo kintu, ne kwikipana ku banyike bamo mu mukwakwa; bamo banyike, mwayukatu, akya kyamwekele nobe babena kukeba kashinkwa kacheche, ne ako. Kyawama, Nalangulukile mba kape Nakonsha kwikala na. . . Ibyo, awa wajinga kapanyi, aye mwine, kwamba kwi amiwa byobya. Awa wajinga muntu kufuma ku kapanyi.

Nanchi, Nalangulukile mba, “Kapepo Na—Naubile kintu kyatama.”

⁷ Nanchi kuno kechi papita kimye kyabaya ne, najinga na muntu usopa. . .Bino abo basopa na tubotolo, mwamona. Nanchi waishile kotwajinga waimana. Aye waambile, “Amba, Mulongo Branham,” waambile mba, “akye kichi kibena kukoma.”

Naambile mba, “Ee.” Naambile mba, “Banyike bakayila mushi yakyo.”

Aye waambile mba, “Twakonsha kwikilekesha nyi?”

Naambile mba, “Ee, bino kechi kwikitemena panshi ne. Mwamona?”

Aye waambile mba, “Kyawama, twakonsha kutemwa kwikitema. Atweba tukakulipila pa kikye.”

⁸ Naambile mba, “Ine. Ine. Kechi mbena kukeba obewa kwikitema ne.” Kyawama, Nayuka mizhilo ya-kwikala-nakyo, ne ayo, mwayukatu, mambo Najinga nakyo pa myaka sebeni. Naambile mba, “Ine.” Naambile mba, “Kechi mbena kukeba kwikitema ne, bino wakonsha kuuba peulu yakyo.” Naambile mba, “Amiwa—Amiwa ne kichiba peulu yakyo, bino,” Naambile mba, “wakonsha. Mwakonsha kwikichiba peulu inge mubena kukeba.” Naambile mba, “Ami, Mulongo Wood ne Ami, tubena kwikichiba peulu. Atweba tuchiba byonse byaya kukwe.” Kabiji Naambile mba, “Bino twafwainwa kutemwa kwikilama namambo a baana babacheche, Joe ne abo, mwayukatu, banyike bacheche bakaila mushi ya kyokya kichi.”

⁹ Amiwa nafuminepo nayile palwendo. Byo Nabwelele, bekitemene panshi ne kwikifumyapo. Oo, aa afwanyijilwe kwikala mambo abaya bingi a kapani, mwamona, mambo akutema kyokya kichi, mwamona. Kabiji nanchi Nalangulukile mba, “Pano,” Naambile mba, “Nkambo, Amiwa kechi nsakwikitongola ne.” Mwamona? “Nangwatu inge kujipo kintu kimo akyo Ami—akyo Ami, pakyoyo, kimye kimo kupana, bino kujatu byafikila mu koyini, kabiji ne kupana ‘ma cent fifite.’” Mwamona? Naambile mba, “Inge pajipo kintu kimo pa kyokyo, lekai kyokyo kifikilemo, mwamona, amba—amba Amiwa—amba Amiwa nalipila, mwamona. Amba Ami...” Kabiji Amiwa ponkapo nalekele kulanguluka kwikala mu Public Service Company, monai, mambo kyafwainwa kwikala kintu kyakukubwezha kunyuma.

Twafwainwa kumona byotuuba. Twafwainwa kwi kikumanya juba jimo.

¹⁰ Banyike, iyai kuno. Bainenu bajingako, bakwabo leelo, Trudy. Naketekela mba kechi wikyubile ne, anweba kechi mwayukile ne. Akye kiji nobe kyakubazhimunatu, Nakonsha kumona. Kabiji anweba mubena kuya na kupwisha. Kabiji twajinga pamo mululwe lwendo. Amiwa ponkapano nkaya mu mbung’eno, kupwishatu ino mbung’eno. Kabiji tukaya ku nzubo.

¹¹ Nakulanguluka mba kyakonsha kwikala kimye kyawama kwamba kwi anweba bonse, kabiji ne apo nakulanguluka mba kyakonsha kwikala kyawama kwamba ku banyike pa kimye kichechetu kasa mukyangye kupwisha. Tangai veeleshi kufuma mu Baibolo, kabiji ne kwamba kwi anweba kufuma pa muchima wami, nobe pa mamineti teeni. Amiwa nsakufumamo mu jishinda jenu. Mwamona?

¹² Kasa kyangye kwamba ku baana ne, Nasaka kwamba ku bakulumpe pamineti umo, ne apo, kwi anweba bonse. Kiji pakino kimye, kapepo, kape kelwendo lukokeshwa bingi, byo lwajinga. Pakuuba byakupitamo byo Nafunda kufuma kwi Lesa, Amiwa kechi nakonsha kutambula teni sauzande dollars ne pa byo Nafunda kwi Nkambo mu kimye kyo Naikala kuno. Amiwa kine naketekela mba Naishile mu kukokela kwa mukambizho wa Wabulume bonse, kabiji Na—Naketekela mba Nakonsha kutwajijila kwikala muyewa musango. Kabiji kuji . . .

¹³ Byo Nayishile, kintu kimo, ke kupichila mu kimwesho, amba Naimene peulu ya Tucson kukwe kimye akya—akya—akya po kyavumine. Kyawama, Mulongo Fred wajingapo byo kyavumine. Kabiji bakompele kyokya kipikichala, mwayukatu, mwiulu. Kabiji Amiwa kechi nalangulukilepo kyabaya pa kikye ne, kechi ne kimwene ne. Nanchi kyatatwile kumwekela bulongo musango umo, juba jikwabo. Kabiji Mulongo Norman, bashanji Norma kuno, bambujile, amba, “Bushe mwikimwene kikye nyi?”

¹⁴ Kabiji byo Natajile, ponkapa pajinga ba Malaika byonka byo Bakonsha kwikala, baikala ponka pa kyokya kipikichala. Mwamona? Natajile kumona kimye byo kyajinga, kabiji kyajinga ikyo kimye, kimotu, pepi juba nangwa abiji kasa kikyanyge, nangwa juba nangwa abiji po Nafumijileko kokwa. Natajile ko kwamwekejile. “Kabeta buyekemusela bwa Flagstaff, nangwa Prescott, uji munshi ya Flagstaff.” Kyawama, apo ipo potwajinga, monai, byonka byo kyajingatu.

¹⁵ “Tweti-sikisi mailoshi kuya mwiulu.” Kika, luya kechi lwakonsha kukila—kukila foolo, foolo mailoshi kuya peulu ne nangwa faivi, luya, musango uji yense wa kafwa nangwa kiji kyonse, mwamona. Mandeke atumbuka pa naitiini sauzande. Ako ke kukila peulu ya makumbi, mwamona. Kabiji naitiini sauzande ke pepi nobe foolo mailoshi kuya peulu. Aye ke tweti-sikisi mailoshi kuya mwiulu, kabiji sate mailoshi kukilang’anya, kabiji mu musango wa pilamendi, inge watalapo pa kipikichala.

¹⁶ Kabiji ku lubaji lwa kuboko-kwa kilujo, monka mo Nemubujile, Namwene, wamwekanyika, awa Malaika. Awa Aye byo aji, kakuji kalupuka, byapi byabwela panyuma, kasa abena kwiya, byonkatu byo kyajinga. Amiwa kechi ne kimwene byo Baubile kimye kitanshi . . . Kuji bintu byavula bingi.

¹⁷ Kabiji byo nayishilenga mu mukwakwa juba jikwabo, kwajinga kintu kimo kyamwekele kyaambile kwi amiwa pa kintu kyo Na—Nafwainwa kuuba. Kabiji kechi—kechi ke mbila yami ne.

¹⁸ Pakimye kimo, Leo Mercier waambile, mba, “Mulongo Branham, kimye kikafika pakupita kikye,” waambile mba, pepi nobe myaka faivi nangwa sikisi yapita, kapepo sebeni, amba, “aye Nkambo ukapipula nyingijilo yobe, Mulongo Branham.” Kabiji wambile mba, “Aye Byo akooba, obewa

kapepo ukabikangatu mulaini mu bipatela, kabiji ne kwamba mba balupukemo mu—mu myanya ne bikwabotu.” Kechi kya umvanyikile bulongo ne, nangwa Naketekela mba Mulongo Leo waesekelenga kwikala wakinshika pa kikyete kintu.

¹⁹ Bino kechi kyaumvanyikilenga bulongo ne, mambo, monai, Nkambo yetu Yesu kechi waubile kyokyo ne. Mwamona? Kabiji Aye wayile mu bipatela. Amwa mwajingatu umo mu kyokya kipatela. Bushe mwavuluka byo kyajinga mu Baibolo nyi? Kizhiba kya Betasenda. Mabumba akatampe amanama aikajile konkakwa, bachibika bibese bimo, bilema, bampofu, banyana, na kupembelela awa Malaika. Bino, akya kyajinga mu kipatela kya bumupashi ako bantu ko bapembejilenga lubuko lwa Bulesa. Kabiji papo Aye mwine Ubuka Lubuko lwa bulesa wayishile kabiji wabukilepotu umo ne kufumako. Nanchi kechi mwakonsha kuketekela muntu ufwa, nangwa nyingijilo ikeya palutwe, kechi yakonsha kukila payoya byoyajinga ne. Mwamona? Amiwa kechi ne kiswishishe ne.

²⁰ Bino byo Natatwile kwaluluka, Mupashi Wazhila waishile pe amiwa. Naipwizhe Leo peni. Natolele kipepala, kabiji Nanembelepo. Kiji mu kikochikala kyanji leelo, inge mwakonsha kumona po kiji. Ke yewa tulela wa kyela kya aluminyamu amo mo Nalonga bintu. Ponkatu pa kutwela mu kibelo, kuji kakitala ku lubaji lwa kuboko-kwa kilujo, ponka palutwe ya tulela. Kyaikala ponkapa. Amiwa ne kibikilepo ponkapa. Naambile mba, “Juba jimo mukekifumyepo. ‘Lesu kechi ukapipula nyingijilo ne, pakuuba Aye ukapipula muntu na nyingijilo.’” Abo byo kikobiwa.

²¹ Monai, Na—Nayuka byo Nafwainwa kuuba, bino Ami—Ami—Amiwa kuuba nauba ne, Amiwa kuuba ne kyuba mu uno musango ye Njimo pa kino kimye ne. Mambo, Nafwainwa kuuba. . . Kintu kimo kyafwainwa kubiwa mukachi kami, akyo kikalengela Lesu kwikyuba.

²² Tubena kukeba kubwela ku nzubo. Baana babena kuvuluka ku nzubo, bonsetu babena kukeba kubwela. Nanchi Amiwa mbena kulanguluka kwibabwezha, inge Nkambo waswa, kapepo pakupwisha kupwila pa Kibelushi, nanchi ke kubwela. Kufuma kokwa, kechi Nayuka ne. Bino Nayuka kimye byo kikobiwatu mwi amiwa, kundengela kukeba bantu, kyapusanako na byo Mbena kumvwa pa kino kimye. Amiwa nakaine ba—bantu, monai, kabiji Ami—Amiwa kechi najingapo na kintu kimo kyakwingila nabo ne. Anweba mwayuka Monekitazha, Amiwa kyotela mba “ricky, ricketta,” bajinga na bintu byo baubile. Nasapwijile na muchima yense, kabiji Lesu wikishinikishe mu misango yonse. “Kabiji inge kechi bakebelenga Kwikiketekela ne, kika, balekaitu bunke bwabo.”

²³ Amiwa nayilenga konkakwa, na kukwatakana pamo ne Bud mu kimye kyakisalo, ne kutatula kwikala konkakwa.

Kupembelela monka mungye, naleka nsuki yami ne myevu byakoma. Kabiji inge Nkambo wakeba mbangye kuntu kumo, Aye wang'ambila, kabiji Naya konka nakwikyuba.

²⁴ Kabiji pa mukwakwa, kasa mbeni kwiya juba jikwabo, Aye wanyimikile. Kabiji Namwene kwepi... musango ye Nayilengamo. Amiwa—Amiwa nji mujishinda ja kuya ku kintu kikwabo. Kabiji Nalangulukile mba, inge Nafika ku nzubo, Amiwa kalenga kyotutela mba misambo ya muchima-pa-muchima, kape ne kwikibika pa tepu, pakuuba mba bantu bakonsha kumona kine kintu kyo kwaikela lupipu lwa bukiji bukiji.

²⁵ Pano, anweba banyike, twayaitu... Twayai tulombe pacheche.

²⁶ Nkambo Yesu, twasata pa kino kimye, pa kuyuka mba twapwila pamo kuno, banyike ne bakulumpe, kabiji ne bamayaka-ya pakachi. Kabiji twapwila pamo, kululwe lubaji lwa Peenape, ne jikwabo ja kwamba pe Anweba kabiji ne bintu byatala pa Bumi bwa myaka.

²⁷ Kabiji baabo banyike baikala muno bufuku buno, bamo babena kupwisha masukuulu, bakwabo bapwishishe kala. Bino Amiwa nalanguluka, Nkambo, kintu kimo kiyamwekele ma awala achechetu kikukuma kikatampe kasa kikyangye kubiwa, nagwa kuvuma kukatampe, kyaubiwe pa mutumba kokwa, ku kabeta kabuyeke bwa Tucson, kimye ba Malaika ba Nkambo kyo bayikijile panshi. Amiwa navuluka byaambiwe, kabiji—kabiji kukizhamo na mambo abakitwala. Amiwa ne mulomba Anweba, Nkambo, tukwashai kumwisha. Kabiji lekai Ng'ambepo kintu kimo ku baabo balunda bakitwala, bufuku buno, akyo kyakonsha kwibakwasha mulwendo. Mambo, Nkambo, atweba bonse tubena kukeba bukwasho pa kino kimye.

²⁸ Tupesheshai pamo. Tulekelaiko mambo etu. Kabiji umvwe pajipo kintu kimo kyaubiwa pa kimye kyo twaikelamo kuno, akyo kyabula kwimusekesha Anweba, twalomba mba Anweba mwitulekeleko mambo pakikye. Mambo twavuluka, leelo, amba kechi tujipo na—naluketekelo lwa keesha ne. Atweba kechi twayuka bikamweka keesha ne. Twafwainwa kwinengezha leelo pakuuba mba tukakumanye keesha. Kabiji, Taata Lesa, kujitu jishinda jimo jo twayuka ja kubilamo kikye, ko kuuba mba, kwinengezha amba tukemumone Anweba, mambo bitende bitende twavuluka mba tukeyyuba. Kabiji tukekikumanya kimye kimo, nangwa mu mutende, nobe mulunda nangwa nobe mwaana, nangwa nobe mulwany. Kikale kwalepa, Nkambo, kyakuuba mba twakonsha kwikala mu musango mukwabo ne kanatu baana Benu Anweba batemwikwa. Swishai bibye bintu twaipuzha, mwi Yesu mu Jizhina. Amena.

²⁹ Leelo, kimye kyo Nabachibaulenga matete, lukeelo kelo luno, Najikutana patu pamo mu Baibolo, Nakulanguluka mba

kyafwainwa kwikala kintu kyawama kutanga pa kino kimye. Kabiji kiji...bino kechi kyakonsha kwikala kyafikilamotu bulongo ne, bino Nakulanguluka pa...pa—pa mamineti acheche, kwambapo. Nasaka kutanga kikye kufuma mu kyapitala kyabu 18 kya Luka Wazhila. Bonse foolo banembeshi ba Mamboawama bekinemba. Kyapitala kyabu 18 ne veeleshi yabu 18.

Kabiji umo ndamakyaalo wamwipwizhe, mba, Mufunjishi Wawama, ngube ka Amiwa pakuuba mba swane bumi bwapeenape?

Kabiji Yesu wamwambijile aye mba, Kika kyo muntelela amiwa amba wawama? kafwako nangwa umo wawama ne, kanatu umo yenka, ao ye, Lesa.

Anweba mwayuka mizhilo, Kuuba bukende ne, Kwipayang'ana ne, Kwiba ne, Kubepela mukwenu ne, Nemeka bashobe ne... bainobe.

Kabiji...waambile mba, Byonse bye Amiwa nguba, kabiji nalaminenga byonse kufuma ku bwanyike bwami.

Ne Yesu pa kumvwa byobyoy, wamwambile mba, Nangwa byonkabyo anweba mwabujilwa kimo: kapoteshai byonse...anweba byo muji nabyo, ne kwabanya ku balanda,...anweba mukekala na nsabo mwiulu:...iya, undondele amiwa.

³⁰ Nalanguluka, kyambo, *Iya, Undondele Amiwa*, abo bwafwainwa kwikala bukwasho bwawama bo Nakonsha kupana inge Mbena kwamba ku banyike baji teni sauzande, nangwa inge Mbena kwamba ku byonji Amiwa. Ke mukambizho, kabiji ke kintu kikatampe bingi kyo Nalanguluka akyo kyapainwe ku muntu yense, kabiji kukijishamo mwanyike, “Undondele Amiwa.”

³¹ Obewa usakulondela muntu umo. Bino, waubatu... Wakonsha kuvuluka kyokyo. Obewa usakulondela muntu umo. Kabiji jishinda jakulondelamo muntu, wikale washiniinwa mba, ing'anyi awe muntu ubena kulondela. Mwamona? Atweba...

³² Paulo kimye kimo waambile mba, “Ikalai bakundondela amiwa byonka Byonji wa Kilishitu.” Mung'ambilo ikwabo, “Byonka byo Mbena kulondela Kilishitu, anweba ndondelainga amiwa.”

³³ Kabiji pano, pa kino kimye kya kupipulwa bintu, akye—akye ke kipimo kya bumi po tufika atweba bonse. Kabiji bimye byavula mung'umvwa amiwa kasa ng'amba mba “ricky, ricketta,” ne bintu bikwabo. Ke, ke nkulo. Ke nkulo yo tubena kwikalamo. Kine kechi ke booba bantu ne.

³⁴ Abo bantu ke bantu baji pamo nobe byo tuji. Aba baana babacheche baji muno na bibye byela byakaba, kasa banyema na kutolauka peulu-ne-panshi mu mukwakwa, ne kuuba bintu

byo babena kuuba, kupepa fwaka ne kutoma maalwa, kabiji ne banabakazhi bamvwala vwajilo yatama, ne bintu bikwabo, abo ke banabakazhi ne banabalume byonka byo tuji. Mwamona? Ke bantu. Baji nabutemwe. Baja. Bantoma. Balala. Bapema. Bafwainwa kufwa. Abo ke bantu byonka byo tuji. Kabiji nangwa byonkabyo baikala. . .

35 Batwelelelwa na mupashi watama. Abo kechi bekiyuka ne. Kechi na mambo a—a bantu ne, ke mambo akuuba mba, bimye bimo, ntangi umo ye babalondelenga wi batwala mujishinda jatama.

36 Bino, anweba basongwakazhi ne basongwalume mwayuka bingi bulongo pa kyokyo. Mwayukatu. Anweba mwafunjishiwa bulongo kukila pa kyokyo. Anweba muji na basemi bawama, lufunjisho lwawama kukila kuuba kintu kya musango yewo. Anweba mwayukishatu bulongo.

37 Bino kechi booba ne, mwamona, mambo bipwilo byo bayako ke bipwilo byakatataka, bya bukatataka. Kabiji abo—abo bekalatu na bumi pa juba jimo, bayukanyikwa bingi bulongo. Kabiji, oo, ami! Kika. . .Byubilo byawama bikala ke buwame kwi abo. Mwamona? Nanchi abo, kika. . .Nobe byonka byo Naambile kimye kimo, mu kisela kyo Namwene kuno, kechi papita kimye kyabaya ne, kya Sodoma ne Gomola, kya kuuba mba awe mwanamukazhi uji-nademona waambile kwi—kwi Lota, “Byo mutela mba byubilo byatama, Amiwa ne bitela mba byubilo byawama.”

38 Yesu waambile mba, “Byonka byo kyajinga mu moba akwa Nowa, nanchi byobyoyo kikekala ne pakwiya kwa Mwaana muntu.” Nanchi twabwela pa kyokya kifulo ne jikwabo.

39 Twayai tumone pa yuwe mulongo, mu mamineti acheche, ye twatangapo. Kechi pajipo luzhinauko amba awe mwanyike wasemekekilwe munzubo yawama, byonka byomuji anweba baana. Aye bamukomeshe ku basemi bawama. Mambo, kyashinikishiwe, kimye Yesu kyo amupele mizhilo ya Lesa. Aye waambile mba, “Amiwa nabalamenga bibye kufumatu ku bwanyike bwami.” Kyamwesheshe mba aye uji na—aye wajinga— aye wakomeshiwe bulongo. Aye kechi wajingatatu wakusopola-sopolatu ne. Kabiji anweba mwayukatu, aye—aye wakomeshiwe mu kuyuka byawama, banyike baji nobe anweba. Kapepo wakomejile ku bainaji ne bashanji bakamwa-Lesa, kwi—kwi—kwi bafunjisha byawama, kimye kyo ajinga mwanyike. Kyawama, akyo kyawama.

40 Kapepo, nobe ka mwaana kakacheche, bainanji bajinga na nkebelo ya kuuba mba juba jimo akekale muntu wayukanyikwa. Bashanji bajinga na mali, a kuuba mba bakonsha ku mufunjisha ne—ne kumupa kufunda kwa kuuba mba. . .amba akapwishe kufunda kwawama kabiji akekalepo kintu kimo mu ntanda. Kabiji na bukishika bwa yuwe maama ne taata, kufunjisha

yuwe mwanyike, kabiji kapepo akafike ku kimye kya kupwisha kwanji nobe aneba, monai, kimye kyo apichile mu sukuulu kabiji waikala na kufunda kwanji. Kechi kyakuzhinauka ne kapepo wajinga wakwitotelamo ne lusekelo lwa—lwa yewa maama ne bumi bwa bashanji. Kechi kyakuzhinauka ne, mu ooa moba, wajinga bambili bawama, nobe byonka byo muji na myotoka, kabiji taata wawama ne maama uji nobe byo muji naabo byonse, aba bekimona kuuba mba, uji na byakuvwala byawama, kabiji—kabiji ne motoka, kabiji bakonsha . . . ne kwiyowa bumi, kijitu pamo nobe byonka byo kiji leelo.

⁴¹ Kabiji bataata ne bamaama na . . . milombelo kimye kyonse mba—mba mwaanabo kechi ekaletu muntutu ne, amba ekale muntu wapusanako. Basemi bonse bakeba kyokyo. Bushe mwaumvwapo Yesu kutongola yuwe mukambizho, “Nemeka bashobe ne bainobe,” wabwela waleka? Mwamona? Kabiji ayo yo nkebelo ya semi yense, kuuba byawamisha ku baana baabo, byo bakonsha kuuba, kwi bafunjisha, kwibapa bintu kapepo byo babujile kwikala nabyo. Abyo Amiwa byondanguluka pa baana bami.

⁴² Nalanguluka mba, kimye kimo, mwaila kuya ku sukuulu, bino; Amiwa nalanguluka, kutuma Becky ne Sarah ne Joseph mu ao masukuulu akatampe ne bintu bikwabo, amo mubena kubiwa byonse-bye? Naketekela mba Amiwa nkebatwala kabiji ne kubwela ku mutumba, kabiji—kabiji ne kwi bakomeshesha konkakwa na . . . byonka bikala ma Indian.

⁴³ Bino kiji bibye. Kika kikafuminamo mu mwanyike. Nangwatu atanwe kwepi, uji na, kikafumamo. Inge muji kyatama mukachi, kikafumina mu kamba wa ki Indian. Inge muji kyawama mukachi, kikalupukila mu kamba uji yense. Mwamona? Kiyilatu ku kiji mu mwanyike, ndengelo-ya mwanyike, kiji mukachi nkobe. Kabiji byo uji pakino kimye kape byobyoye ukekala mu bumi bobo bonse bwashala. Obewa uji pakifulo kya lupipu.

⁴⁴ Bushe mwayuka nyi? Eite-sikisi paseti wabaluluka mwi Yesu Kilishitu kyubiwa pa myaka twenti-wanu kasa ikyangye kufika. Kibimwsha. Kubalwa kwikimwsha. Eite-sikisi paseti wa booba beya kwi Kilishitu, beya tweti-wanu kasa ikyangye kufikila. Anweba, inge mwapita payoya myaka, bekala bashimikwa kala nangwa baimikwa mumashinda abo. Oo, kyakonsheka, kine. Bafika, sebeta, eite, myaka ya kukoma, bino bikala ke bimye bibula kumweka mweka. Mwamona?

⁴⁵ Wilenga obewa mwine mu kimye kyo ukiji mwanyike. Wimika nkebelo yobe ya byo ukeba kuuba, kabiji ne byobyoye byo ukeba kunonkelamo mu bumi. Wikilanguluka. Kabiji monka mo ulangulukila, ee mwane, milanguluko yobe, ipewa mu milanguluko yobe mu kintu kimo kyabula kuyukanyikwa akyo—akyo kitoola sambu yonse mumilanguluko yobe. Kabiji pano

umvwe kyaikala mu milanguluko yobe, ipo po wikyamba, amba usa kwikyuba. Kabiji pano nkebelo yobe ikutwala konka kwi akyo.

⁴⁶ Nanchi, maama ne taata, ubena kuketekela yuwe nsongwalume ku...nkebelo yanji ya kwikala wayukanyikwa; ne mali avula a kwingila nao. Kabiji pano, kwakubula ne luzhinauko, balombejile mba awe—awe nsongwalume wakonsha—wakonsha kwikala na jojo njishuko. Mwamona, abo—abo baubile byonse byo wakonsha kuuba. Aye kape uji na bambali bavula, kabiji—kabiji kape wajinga wayukanyikwa bingi mu banabakazhi.

⁴⁷ Kabiji kyonsha kwikala kya mwanamulume, kyonsha kwikala kya mwanamukazhi, ne kwalwila ku lubaji lukwabo, mwamona, mambo tubena kwamba pa bumi bwa muntu, myeo, bonse babiji banabalume ne banabakazhi.

⁴⁸ Kabiji nanchi, panyuma ya jije jishuko jo ajinga najo nsongwalume, monai, waikela “ke musebo pingule,” byo twikitela, wafikile pantu po abujile kutako muchima. Basemi yanji bajinga na mali. Aye wajinga...Aye wajinga bingi... Aye waikela ke ndamakyaalo. Aye Baibolo wamutongola papo, wa...amba mwanyike, mwanyike munoshi ndamakyaalo. Kabiji twamona...Pa myaka icheche, kape mu myaka yanji ya bwanyike, po apwishatu sukuulu, po apwishatu sukuulu, kape, milungutu icheche kunyuma, nangwa kintu kimo, aye waikela...Aye ke ndamakyaalo, kabiji wajinga na byonse michima kyo ikabila.

⁴⁹ Kabiji nsongwalume kechi wajinga ricky wa bukatataka ne. Aye ke mwanyike wawama. Naketekela, Luka byo anembelenga pa kikyee, nangwa Mako, Naketekela byo kyajinga, Yesu wamuntajile kabiji waikizha ne kyefu, mambo Aye wamutemenwe. Mwamona? Pajipo kintu kimo pa yuwe mwanyike. Kwajinga bu buntu bwawama bwajinga na yuwe mwanyike. Kwepi ko afumine? Kufuma ku kisemi kyawama bingi kya mufunjishe mizhilo ya Lesa, kabiji bamwene mba wiyilama. Kabiji wikyubile, kufuma ku bwanyike bwanji.

⁵⁰ Kabiji songwalume wajinga na nkebelo; aye wakebelenga Bumi Bwapeenape. Aye waabile mba, “Mufunjishi Wawama, kika kyo Nakonsha kuuba amba ngikale na Bumi Bwapeenape?”

⁵¹ Monai, pa byonse byo muji nabyo pantanda, nangwa byonkabyo mweo mukachi kenu wimubuula mba pajipo kintu kimo kyo mubena kukabila, akyo kyo mwabula. Mwaila kulondela bunoshi...Nangwa, kechi kimye kyonse kikalatu bunoshi ne. Kyakonsha kwikala, kuyukanyikwa, nsongwakazhi umo walamba, uji na buya bwanji bo alangulukapo. Kapepo wayukanyikwa bingi ku sukuulu. Kape nsongwalume wakonsha kwikala na nsongwakazhi yense ye akeba. Aye umvwa nobe ujitu bulongo. Abo kechi ke bukikizhi ne. Abo bikubukatu nobe

jiluba mu bujimi. Mwamona? Bikaya palutwe. Kechi bikekala kimye kyabaya ne. Bimye bicheche bya kusama kwa juba, nishi kyapwa, pano obewa ushalatu na mweo ao wafwainwa kwikala na bumi Peenape.

⁵² Kabiji awe mwanyike wajinga na bumuntu bwawama bingi, mambo aye wipaine aye mwine kwi Nkambo Yesu, byo ayukile kufukama ku manungo anji. Aye waambile mba, “Mufunjishi Wawama, kika kyo Nakonsha kuuba mba ngikale na Bumi Bwapeenape?”

⁵³ Aye waambile mba, “Kika kyo mutelela Amiwa mba wawama,” waambile mba, “byo mwayuka amba kujitu Umo wawama, kabiji ao ye Lesa?” Mwamona? Kika kyo aambile awa mwanyike mu kikyey? Amba Aye ye Lesa. Mwamona? Aye waambile mba, “Obewa wayuka mikambizho. Ilamenga.”

Waambile mba, nanchi aye waambile mba, “Ng’anyi mikambizho, Mufunjishi?”

⁵⁴ Aye waambile mba, “Mikambizho ya ‘kunemeka bashobe ne bainobe,’ kabiji ne ikwabotu.”

⁵⁵ Aye waambile mba, “Aaye Amiwa ne yuba, kufuma ku bwanyike bwami. Mwamona, Naubilenga yiye.”

⁵⁶ Aye waambile mba, “Nangwa byonkabyo wabujilwa kimo. Yanga, kapoteshe byo uji nabyo, ne kupana ku balanda, kabiji undondele Amiwa.”

⁵⁷ Jishuko ja musango ka! Ao wafwajilwe kwikala Petelo, Yakoba, nangwa Yoano, umo wa mwi abo. Monai, mwanyike wafunjishiwe ne kukomeshiwa bulongo, kabiji ne kuletwa kwi Kilishitu, amba amwingijishe mu byonse byafwainwa kufikilamo byajinga mwi aye, amba engijishe, kapepo kufunda, bwanyike, bunoshi, bongozhi, ko afwajilwe kutwala Mamboawama, bino nangwa byonkabyo Wiakaine. Kyajinga kya—kyajinga kintu kyakonsa bingi ku songwalume mwanyike! Mwamona?

⁵⁸ “Undondele Amiwa.” Pano, monai, aye walondejilepo muntu umo. Bino, aye wafwajilwe kulondela bongozhi bwa bantu bo atanwanga nabo, bongozhi bwa inetu umo mwanyike, bongozhi bwa jibumba ja bansongwalume jo atanwanga nabo, bakwabo ku sukuulu, nangwa kulondelapo Yesu Kilishitu. Mu buwame bwanji bonse, nangwa byonkabyo aye wayukile mba kechi uji na Bumi Bwapeenape ne.

Baana, abyoy byo mwafwainwa kulangulukapo. Mwamona?

⁵⁹ Pano monai pa nsongwalume bufuku buno, byo afwajilwe kwikala, kabiji ne byoaji, ne byoaji bufuku buno. Aye ujipo kuntu kumo. Aye wajinga muntu. Aye ujipo kuntu kumo. Aye ubena kupembelela Buchibishi bwa mambo. Aye ubena kupembelela kukumanya Buchibishi bwa mambo pa joja Juba, kukana jishuko jimo jaletwa kwi anweba baana, pepi nobe mu

musangotu umo; baana bawama, bumuntu bwawama, bataata bawama ne bamaama, byo muji nabyo, kechi mwakonsha ne kwingila ne kanatu obewa ubena kukeba. Mwamona?

⁶⁰ Bino kujipo kintu kikwabo kyendela pamo na kyokyo. Kujipo kintu kimo kyendela pamo na kyokyo. Akyo Kyambo, bufuku bunu, kechi kifwa ne. Kikijitu kyakatazha ku yense mwanamulume ukitwala, yense mwanamukazhi ukitwala, “Undondele Amiwa.” Mwamona?

⁶¹ Byambo kechi bifwa ne. Umvwe waamba kiji kyonse, vulukaitu mba, nangwa kiji mu motoka obe kwabuke, nangwatu kiji mu pulupiti, nangwa kiji mu mukwakwa mu koonna na mulunda obe nsongwalume nangwa mulunda obe nsongwakazhi, konse kokiji, kechi kifwa ne. Kya—kyafwainwa kwikala myaka ne myaka.

⁶² Byo Namwene awa nsongwakazhi ye Na . . . bufuku bukwabo mu kimonwa, walamba nsongwakazhi mwanyike, ukaya bisela mu Hollywood, kabiji Namumwene byo afwilenga, kufikako, na kweseka kukeba kupana bukwasho. Wafwile na kikola kya muchima, Miss Monroe. Kabiji pano akyo kyajinga myaka ibiji yapita, kabiji Namumwene kasa abena kufwa. Kabiji moba abiji palutwe wafwile.

⁶³ Nanchi, bufuku bukwabo, Naumvwine jiwi ja yewa songwakazhi. Byepi? Baana baji kumbulanga ami mba, “Taata, anweba muya kuyewa Mukola Wa Kubula Kubwela, kimye kyonse.” Baambile mba, “Banji na kisela kya musango yewa, bufuku bunu.” Bambujile bufuku bumo amba kisakwikalako, mulungu umo nangwa ibiji palutwe ya kyokya kimye. Nalangulukile mba, “Kyawama, Nakeba kwikimona, mambo Amiwa nafikako kuyewa mukola, jibiji nangwa jisatu; pepi nobe bimye faivi, Nalanguluka.” Kyawama, Amiwa—Amiwa nakebelenga kwikimona.

⁶⁴ Kabiji Miss Marilyn Monroe ye wakaile kyokya. Kyawama, awa wajinga nsongwakazhi ye Namwene mu kimwesho. Kabiji wajingamo, mu kipikichala, ne byubilo, byonka byubilo byo aubile mu *Awa Mukola Wa Kubula Kubwela*, byo asendele kyokya kipikichala, kapepo myaka fiftitiini yapitapo. Kyajinga kipikichala kyakala, kapepo myaka tweti yapitapo. Kabiji po afwijile papita myaka ibiji. Kabiji awa ne jikwabo, mumi, byubilo byonse ne kyambo kyonse. Mwamona? Kikijitu pa tepu kufika ne byo akekala na bumi jibiji.

⁶⁵ Kechi kyonka kyotu ne, bino bintu byonse byo twamba byumi. Kyambo kyonse kyotwamba kechi kyakonsha kufwa ne. Bibena kwiya na kupita mu kibamba ke byambo pakino kimye, misango ya bantu. Televizhonyi ikitola. Mwakonsha kwamba ponka pano, kabiji bakonsha kukumvwa ntanda yonse, awa yeka sekondi. Kabiji kasa mukyange ne kwikyumvwa mu

kino kibamba, kyaya kuzhokoloka ntanda yonse, monka mu byamalaiti.

⁶⁶ Kabiji galashi ikatampe ya kwa Lesa ikitola. Kabiji kwenda kuji konse ne byubilo byo uba, obewa ukekikumanya pa Buchibishi bwa mambo. Mwamona? Nanchi, mulunda mwanyike, ke kintu kyawama kuleka, langulukaipo pa bibye bintu, mwamona, mambo obewa ukekikumanya ne jikwabo. Mwamona?

⁶⁷ Twayai tumone yuwe mwanamulume mwanyike, jishuko jo ajinga nanjo, kabiji obewa ibike mu kifulo kyanji. Kabiji nsongwakazhi, kijitu pamo byonka biji Becky ne Marilyn, kijitu pamo nobe obewa waimana mukifulo kyanji, kabiji wakonsha kumvwa aja Jiwi jikiji jumi.

⁶⁸ Jikiji jumi. Jikyenda. Sayaasi yamba mba, “Twati myaka kufuma pa kino kimye, bakatola jonka Jiwi Janji jo Aambile, papita myaka tuu sauzande.” Jikiji jumi. Kijitu pamo nobe jibwe japonena mu kalunga kameema kakatampe, manyaki kechi aleka ne. Aya nakufika ku kitulu, masauzande a ma mailoshi, kabiji abwelakanya.

⁶⁹ Umvwe jiwi jaambiwatu mu mumwela byonkabya, kechi jifwa ne. Kafwako nangwa kimo kyo wakonsha kwamba ne pa Buchibishi bwamambo. Jikiji konka. Kukekala Jiwi ja Yesu Kilishitu kasa jikambizha awa mwanamulume mwanyike, “Undondele Amiwa,” kabiji ne aye waaluluka, ponka pa galashi, na bulanda, mambo wajinga na bunoshi bukatampe. Mwamona? Kechi twafwainwa kwikala na... Kechi kimye kyonse kyafwainwa kwikala mali ne. Kyakonsha kwikala bintu bikwabo. Mwamona? Kintu kyonse kyo twatemwisha kukila lolwa lwito, monai, kikalatu nobe mali kwi atweba. Kikala ke kintu kitonauna.

⁷⁰ Pano twayai tumulondeko pacheche. Kika kimweka umvwe waaluluka wabwela? Aye kechi watelekele kujoja Jiwi ja Kilishitu ne. Aye wayile na balunda nanji.

⁷¹ Akyo, anweba banyike, mwi banyike bawama, kabiji mwakonsha kwikala na balunda, pakuuba talai ng’anyi musango wa mulunda ye uji nanji. Inge awa mulunda ubena kulondela Kilishitu, yanga nayewa mulunda. Balondela Kilishitu, ne obe. Bino inge wabula kwikyuba, kechi wikyube ne.

⁷² Twayai tutale pe aye. Twatana kuuba mba, aye kape walaminenga balunda nanji. Aye waikela ndamakyaalo mukatampe. Aye wajinga ndamakyaalo pa kyokya kimye. Palutwe, twamutana uji bingi na bunoshi poso aye—aye—aye washimika matala akwabo mwakubika bipe byanji. Kabiji pano waambile kwi aye mwine, byo akotele, kabiji bya kisangajimbwe bya bwanyike byapita, byonse byo aubile, kape, ke kusekeshatu bantu.

⁷³ Inge mwanamulume mukulumpe nangwa mwanamukazhi mukulumpe, nobe ami, mukazhi wami, bainenu ne bashenu, kechi pajipo kintu nangwa kimo kyo bakonsha kulanguluka ne. Abo kechi bakonsha ne, kechi bakeba kulupuka pangye ne—ne kunyema na-kutolauka-tolauka mu mukwakwa, mwayukatu, byo—byo bafwainwa kuba balunda banyike, ne banyike banabakazhi. Kubalwa kwa moba, kabiji ukekala mukazhobe ng’anyi nangwa mulume obe, nangwa, mwamona, kechi bajipo nakyu mu milanguluko yabo ne. Abo, baji na baana, batako muchima. Byo kikekala kwi anweba bonse, keesha, inge keesha ukekalako. Mwamona?

⁷⁴ Kabiji monai yuwe mulunda, nanchi, kapepo. . . Kapepo kechi wasongwele ne kusongola ne. Kabiji, nangwa byonkabyo, wajinga tangi mukatampe. Kabiji waikele ponka. . .

⁷⁵ Kabiji byonka byokiji mu Yelusalema, nangwa byonkabyo, leelo, bajiila peulu ya nzubo, pa kino kimye kya juba, inge kwatalala, mu mabaanga.

Kabiji twatana muntu mukwabo uji nanji pamo: ke kalomba.

⁷⁶ Kabiji muntu, yebakomesha ku—kunemeka mukwenu, ne kuuba ku bakwenu byonka byo wakonsha kutemwa kukubila obewa, monai, pa kukana akwa kwita kwa Kilishitu, kyapelako. . . Kyamweka nobe, nsongwalume ye bakomesha mu nzubo ye musango yewa, abya inge kechi byafuminemo mwi aye ne, bino kyaubiwe. Kyaubiwe.

⁷⁷ Kabiji kwajinga muntu pa kibelo, wa jizhina ja Lazalaza, wamulombelenga kajo, bino kwabujile bukwasho. Aye wafwaijilwe kuja tupona kutebulu, bino kechi kyafikijilemo nangwa ku ulomba ne, kana bakabwa. Kabiji wajinga na bilonda mubiji yense. Pakuuba awa muntu wajinga wapeulu mu kijiji, nanchi, aye kechi wajinga na lusa ne. Aye wazhindaminetu, mambo aye wakaine jishuko jafumine kwi Kilishitu.

⁷⁸ Kabiji kape kimye kimo kya mabaanga afubuku, mu kikye kimye, wasangalelenga na binyu byawama, ne banabakazhi bawama, bekobaika mankosa, bamuzhokolokele, kabiji ne bintu bya musango yewa, bisaka muchima wanji, ne kusangalala. Kalomba kasa alala pa kibelo.

⁷⁹ Kabiji kasa bukyangye kukya, lukeelo lwalondejilepo, aye watainwe mu ngehena, na kubijika kwi Lazalaza amba a mubike meema pa lujimi wanji. Lupipu lwa bintu.

⁸⁰ Kabiji mwamona, byo aambile mba, “Taata Abulahama,” bino, aye watwajijiletu na kuvuluka amba Abulahama wajinga shanja ba Yudeya. Aye waambile mba, “Taata Abulahama, mutumai kuno ao kalomba Lazalaza na tumeema tucheche ku minwe yanji, ambike pa mivumbo yami. Akwe kulakauka kwa mujilo kwamanyika.”

⁸¹ Kabiji aye waambile mba. . . kabiji Abulahama waambile mba, “Kiji, kechi Nakonsha kuuba kyokyo ne,” mu byambo byavula. “Kabiji ne pa byonse bye, mwamona, wajinga na jishuko jobe mu kimye kya bumi.”

⁸² Kimye ka kyo ajinga najo? Kimye Yesu kyo aambile mba, “Undondele Amiwa.” Bino aye wakaine. Aye waile mujishinda jo akonsha kulengelamo mali. Kabiji akyo kijitu bulongo, kafwako k yatama na kulenga mali ne, bino balondela Yesu kimye kyo ubena kwikyuba. Mwamona? Kabiji wayile mujishinda jikwabo, na jibumba.

⁸³ Kabiji mwatana mba, waambile mba, kabiji Abulahama waambile mba, “Kabiji pa byonse bye, paji mukolo pakachi nkobe ne aye, kyakuuba mba kafwako muntu nangwa umo waabukilepo kala ne, kabiji kechi kukekala ne. Aba baji koko kechi bakonsha kwiya kuno ne, kabiji baji kuno nabo kechi bakonsha kwiya koko ne. Biji byaikajikwa. Kafwako muntu wa abukapo kala ne nangwatu ukabuka.”

⁸⁴ Pano telekai kwi aye. Aye keakebe kwikala musapwishi pano. Alwa lwito Yesu lo amupele, lwa—lwa kumulondela Aye, lwajinga, amba aye ekale wakuwina myeo, nobe mwanamulume mwanyike, kya mubwelejile jibiji. Aye wikivulukile, wajinga na balongo faivi, kubwela pantanda, kabiji aye kechi wibakebele mba baye kuyoya mpuzha ne.

⁸⁵ Aye waambile mba, “Tuma Lazalaza, nanchi, abwele na kubula balongo bami mba kechi bakonsha kwiya kujino jishinda ne.” Mu byambo bikwabo, “Betabe lwito lwa, ‘Undondele Amiwa.’” Mwamona?

Bino aye waambile mba, “Abo, kechi bakekyuba ne.”

⁸⁶ Aye waambile mba, “Ee, inge umo wakonsha kusangula ku bafwa, nobe Lazalaza, kabiji wabwela na kwibabuula.”

⁸⁷ Mwamona, kimweshwa mba, inge twafwa, obewa ukiji na milanguluko. Aye wavulukile. Abulahama waambile mba, “Mwaana, vuluka, mu moba obe.” Mwamona? Obewa ukivuluka. Obewa kechi utaya kulabijila kobe ne. Uvuluka.

⁸⁸ Kabiji kuvuluka muntu ko akonsha kwikala nako, kabiji muyoya mpuzha imo, wavulukile jishuko jo ajinga najo ja kumvwa Yesu kwamba mba, “Undondele Amiwa.” Bino aye walondejile muntu ungi, ke jibumba jatama. Aye watainwe mu jibumba jatama, kabiji wayile ku kifulo k yatama, watanwa mu Peenape watama; ke kwabanwa pa joja Juba, kufuma kwi Lesa myaka ne myaka.

⁸⁹ Yesu ne aye waambile kyambo kimo kikatampe, “Nangwatu umo abuke kubafwa ne kubwela, nangwa byonkabyo kechi bakonsha kushiniinwa ne. Mambo, baji na mizhilo yakwa Mosesa, kabiji umvwe babula kwiyumvwa, nanchi kechi

bakonsha kumvwa ne nangwatu umo wabuka kufuma kubafwa. Abo kechi bakashiniinwa ne.”

⁹⁰ Kika? Kika? Bushe mizhilo yaambapo kintu kimo kiji byobya nyi? Ee. “Uba ku bakwenu nobe byo wakonsha kudemwa abo kukubila.” Kabiji aye waikelenga mu kiimye kya mizhilo. Bino walekele ulomba wafwila pa kibelo. Mwamona? Waikele—waikele mu kimye kya mizhilo ya kwa Lesa, bino wakakelwe kumona abwa Bumi bukatampe Bwapeenape.

⁹¹ Baana, anweba, umo umo, muji pamo nobe bami. Anweba, umo umo, mwamweka nobe baana bami babalume ne babakazhi. Mujishinda jimo, obewa byo uji, mwamona, kwamba mwaila bumupashi. Abyo ibyo. Aye Nkambo Lesa wa—wabika myeo yenu mu bukalama bwami, mambo mwiya, na kuteleka kwi amiwa. Anweba mwaketekela. Mwamona? Kabiji mu mulanguluko mukwabo wa kyambo, anweba mwi baana bami babalume ne babakazhi. Abyo ibyo.

⁹² Kimye kyonse vulukai, kulama mikambizho yakwa Lesa ke kintu kikatampe bingi. Kukomena mu nzubo yawama ke buswanyi bufuma kwi Lesa. Kabiji pakuuba mba baana bekale na bumuntu bwawama nobe bo muji nabo, ke kyawama. Kyawama, kwikala wafunda. Ke kyawama kwikala mu ino ntanda ya kasuluka. Tuji na bintu byavula byo twakonsha kusachila.

⁹³ Pakuuba kujipo kintu kimo kyo wakonsha kubula kuswana. Obewa wafwainwa Kwikitaba. Abo ke Bumi Bwapeenape. Kabiji akyo wikyubatu pa kulondela Yesu, pakwikala na kyakupitamo kya kusemwa-jibiji. Kechi usule kyokyo ne.

⁹⁴ Jishimikila jicheche jo Naumvwine kimye kimo, ja muntu ao wajinga, oo, wajinga muyanji. Kabiji aye—aye kimye kyonse wakebelenga ku . . . Ke jishimikila jicheche jawama, nobe. Kimye kyonse kikala ne amiwa, nangwatu byonkabyo. Kabiji juba jimo watolele jiluba. Kabiji jiluba jajinga ja majiki, kabiji jiluba ja mukumbwile, ne kwamba mba, “Obewa waikala muyanji mu bumi bobe bonse.” Aye waambile mba, “Pano ipuzhai kyomukeba, kabiji kikapewa kwi obewa.”

⁹⁵ Aye waambile mba, “Awa mutumba kokwa wakonsha kushiinkuka, kabiji Nakonsha kutwelamo na kutana golonde mu mutumba.”

⁹⁶ “Kyawama,” aye waambile mba, “obewa wafwainwa kusenda konse ko ukaya. Mwamona? Obewa ukasenda kaye nobe. Nanchi, konse Amiwa nkonji, nanchi wakonsha kwipuzha kyo waswa.”

⁹⁷ Aye waendele kuya ku mutumba, kabiji mutumba washiinkukile, ne kutwela watwelele. Bitala byajinga byayula na golonde ne daimani, monka mwaila jishimikila jicheche jawama. Aye wabikile jiluba panshi pa—pa tebulu, nangwa, pa jibwe. Kabiji aye wanyemene na kutambula jibwe jabuneme jikatampe,

ne kwamba mba, “Amiwa nafwainwa kuya na kumweshwa jije ku balunda nami. Kabiji pano Amiwa ne muntu wabunoshi. Amiwa pano nji na bintu byonse. Amiwa nafwainwa kumweshwa kikye.”

⁹⁸ Kabiji nanchi jiluba jaambile mba, “Bino,” amba, “obewa walubako kintu kine.”

⁹⁹ Nanchi aye wanyemene kubwela na kwikitola, waambile mba, “Kyawama, kapepo Nakonsha—Nakonsha kutola jibwe ja golonde. Amiwa nsakutola jibwe ja siluva.” Kabiji nanchi aye waambile mba, “Nsa—Nsakupelawizhako, kubuula bantu byo Nji na bunoshi, kabiji byo byonka Amiwa byo Njinabyo.”

¹⁰⁰ Kabiji aye wayinshile ku kibelo, ne jiluba jamwambijile mba, “Pakuuba obewa walubako kintu kine.”

¹⁰¹ Nanchi aye wanyemene kubwela jibiji. Aye waambile mba, “Muno tutaana misango ya bintu byonse.” Nanchi, aye watolele jibwe. Aye waambile mba, “Amiwa nsakuya, nakutola jije jibwe ne kumweshwa bantu musango wa jibwe uno mutumba jo alengwako, nanchi Nakonsha kumona mba nabwela konka.” Mwamona?

¹⁰² Kabiji watatwile kuya ku kibelo, kabiji jiluba jaambile mba, na mambo. . . jo japelako, “Obewa walubako kintu kine.”

“Oo,” waambile mba, “oo, zhindamapo.”

¹⁰³ Monai, aye kechi wakebelenga kwikumvwa ne jikwabo ne, “Walubileko kintu kine,” kabiji aye wanyemajile ku kibelo. Kabiji byo aubiletu byobyo, kibelo kishiikile kunyuma yanji, ne jiluba kasa jiji mukachi. Kintu kine kyajinga jiluba. Mwamona? Kintu kine kyajinga jiluba.

¹⁰⁴ Myaka yapita kunyuma, kasa nji mwanjike, nobe byo mwayuka anweba bonse, muno, kulama bang’ombe kulutwe kukwe, kulutwe ya Phoenix. Natangilenga kibese, kya kukeba byabunoshi, kipepala kyaamba pa muntu ukeba bya bunoshi. Bino, akwa kechi kwajingapo ne mikwakwa ya kupitamo ne, kana tu mashinda tucheche twa busenga. Abo bakingila mwingilo wabaya wa kukeba mabwe abunoshi kuno, mwayukatu.

¹⁰⁵ Bino awe ukeba byabunoshi wayishile, kabiji wataine mali avula bingi, ne kupota golonde wavula. Kabiji mu mukwakwa wanji, waikele mu kanzubo nkoataine. Kabiji aye wajinga na kabwa, ne, awa—awa kabwa, wamunkashijile pangye. Kabiji abwa bufuku, kwajinga bambazhi bamulondejilenga, amba batambule golonde. Aye wiyisendele mu mikochi yakala ya bena Spain, kabiji wayishilenga nayo. Kabiji kabwa watatwile kuboza.

¹⁰⁶ Kabiji awa muntu kechi wateeleko muchima ku yewa kabwa ne. Waambile mba, “Zhindama.” Aye waambile mba, “Keesha, Amiwa kasenda bibye ku—ku muzhi.” Kabiji Amiwa koba. . .

Byubilo bya jishimikila byajinga bibye. “Kabiji Amiwa ke bipima, kabiji Amiwa nkekala muntu munoshi. Kabiji Amiwa kapota myotoka ya munema. Kabiji Amiwa nkekala na misango yonse ya banabakazhi ne bijiilo bikatampe. Kabiji Amiwa nkekala munoshi, mambo Amiwa namona kala pa kutapila. Njina golonde kuno, yavula bingi.” Kabiji waambile mba, “Amiwa nkoba . . .”

¹⁰⁷ Kabiji mu kimye kyo akebelenga kulala mutulo, kabwa walekele kuboza, mambo kabwa wamwene bambazhi kasa beya, na kukalaba, kupembelela awa ukeba byabunoshi amba alale.

¹⁰⁸ Waimene ne jikwabo, ne kukajipila kabwa jibiji, waambile mba, “Zhindamatu.” Kabiji awa kabwa kamulanda wabulumine ne kweseka kujimuna nkambo yanji bulwanyi bwabezelenga—bwabezelenga. Kabiji byo . . .

¹⁰⁹ Kimye kyalondejilepo, kabwa byo atatwile kuboza, awa ukeba bunoshi wajinga na buta bwashotigani. Aye kechi wakebelenga ku mukatazha ne, nanchi waimenetu waloza kabwa. Kabiji awa ukeba bunoshi waipaiwe abwa bufuku, ku bambazhi. Byonse byo alotelenga bya bwikalo bwawama kechi bya mukwashishe ne. Kika? Aye wazhindamikile jiwi ja mujimwinenga.

¹¹⁰ Kechi kuji muntu wakonsha kubapo kintu kimo, anweba banyike, ukabula kubapo kintu kyatama ne, panyuma ya kwimukomesha byonka byomuji, kanatu waumvwa kintu kimo kya kubuula mba kwi kyuba ne. Pano, kechi uzhindamike aja jiwi jibena kukujimuna ne.

¹¹¹ Kabiji kimye kyonse vulukai, swai aja Jiwi jaambile mba, “Undondele Amiwa,” kabiji kimye kyonse ukekalatu bulongo. Naketekela mba anweba mukooba. Amiwa nji naluketekelo mwi anweba. Bino kimye kyonse vulukai mba Yesu, aja Jiwi, jiji na bumi panopantanda bufuku buno.

¹¹² Kijitu pamo, jiwi jonse ne kyambo kyonse kyotwaambile kijitu kyumi, inge aja jiwi jalupuka muyoya ng’endelo ya lubesha. Aye . . . Mwamona, anweba muji na tulasimita muno wi atuma. Anweba yenu batulasimita be atuma. Bino kisenda kitesheni kutambulwila oa mawi.

¹¹³ Kabiji Yesu wajinga Tulasimita wa Kyambo kya Lesa, mambo Aye wajinga bu—bu busatu bwa Lesa bwamwekanyika mu Muntu umo. Aye Lesa wapwijijika kabiji akwe Muntu wapwijijika.

¹¹⁴ Kabiji busatu bwa Lesa, busatu bwa milanguluko ya Lesa, nobe byo ajinga Taata, Mwaana, ne Mupashi Wazhila, bwaimejileko muyewa Muntu umo, Yesu Kilishitu. Nanchi, akwa, Aye wajinga Kyambo.

¹¹⁵ Kabiji Aye wajinga Tulasimita waambile mba, “Aye umvwa Byambo Byami, ne kwitabila mwi Aye wantuma Amiwa, uji na

Bumi Bwapeenape.” Mwamona? “Kine Nemwambila namba, aye umvwa Byambo Byami, ne kwitabila mwi Aye watuma Ami, uji na Bumi Bwapeenape.” Pano, akya Kyambo kyafumine mu Tulasimita. Aye waambile mba, juba jimo, “Kine Nemwambila namba, inge mwaambila yuwe mutumba mba, ‘Enda,’ ne kuzhinauke mu muchima obe ne, bino waketekela mba kyo waamba kisa kufikizhiwa, kyafwainwa kubiwa kyo waamba.”

¹¹⁶ Pano, inge wakonsha kwikala kitesheni kya Kwikitambulwila, monka mu kutangijilwa mukachi kobe, konka ku lwitabilo, kikakwendesha kukuleta mu kizhingu kya Lesa, mu Kusemwa kupya, kabiji ne kusemwa jibiji. Nanchi kimye kyonse ukekala wakwatakana nanji, mu kumvwa joja Jiwi ajo jikapana lujimuno kimye kyonse inge kuji bulemo bubena kwiya. Inge bintu byatama, bibena kuya mungi, Kikekala ke lujimo kwi obewa kimye kyonse. Kabiji pano, mukifulo kyakuuba mba juba jimo kyaikala nobe yewa songwalume mwanyike munoshi ye tubena kwambapo; kwikala muntu nobe mutumwa Petelo, Paulo, nangwa nobe muntu umo waletele myeo kwi Yesu Kilishitu. Anweba mukobe kyokyo, banyike.

Twakonsha kulomba nyi?

¹¹⁷ Nkambo Yesu! Bakitwala, banabalume ne banabakazhi bakeesha, inge keesha ukekala konka. Twafwainwa kwibafunjisha, Nkambo. Tubena kumvwa kyokya kinemenezhi, kya kwibafunjisha nobe kukekala keesha. Inge kechi kojiji ne, nanchi jonka jaleelo jo juba.

¹¹⁸ Kabiji pano, Taata, twayuka mba kafwako nangwa umo witabilwa ku meso Enu ne. Kafwako muntu utambwilamo lukumo ne. Kafwako kufunda ne, nangwatu bibye bintu bikale byawama byo byafwainwa kwikala, kafwamo mingilo yawama ne, kafwako kipamo kyabupopweshi, kafwako sayikoloji ne, kafwako nagwa kimo kyakonsha kushiniikisha Lesa ne kanatu Mupashi Wazhila ne. Aye kyo Kingijisho, Lesa Aye mwine, mu musango wa Bumi Bwapeenape, abo bwakonsha kwiya kwi atweba nobe pa muntu bunke. Kabiji twasata pa kikye.

¹¹⁹ Kyaambiwa bulongo kimye Petelo kyo ashimwine. Yesu waambile kwi aye mba, “Buntushi bwa nyama ne mashi kechi bo bwimusolwelakyo ne. Anweba kechi mwikifunjile mu sukuulu wa byambo byawama ne. Anweba kechi mwikifunjile mu sukuulu umo ne.” Ke kintu kya pa muntu bunke, kintu muntu bunke kyo akonsha kutambula. Anweba mwaambile mba, “Pa jonka jino jibwe po Nkatunga Kipwilo Kyami, ne binzhilo bya kalunga kechi bikekishinda ne.” Twasata pa kyokyo, Nkambo.

¹²⁰ Aja Jiwi jikiji jumi bufuku buno. Kabiji ku kiji bifulo, ne bifulo bya bicheche, bifulo byakutelekelapo, bitesheni bakutambulwilapo, bya lwitabilo, abyo byakonsha Kwikitambulwila. Twalomba mba umo umo wa baabo baana a Kekitambule, Nkambo, mu michima yabo. Kabiji vulukai mba,

kechi byo booba pakuuba mba bekale bawama ne, bino abo. . . Lesa kechi wituzhachisha pa byotuba ne, kana kupichila mu byo twatambula. Twapulukila konka ku lwitabilo lwetu, kabiji kechi mu mingilo yetu ne. Nanchi twalomba, Taata Wamwiulu, amba batambule kimonwa ponkapano, kabiji bamone ne kumvwa alwa lwito lukatampe lwa Peenape, lwa “Iya, undondele Amiwa.”

¹²¹ Lekai umo umo wa mwi abo, Nkambo, afume ku bintu byonse bya muntanda, abwe bumi, bumi bwapelelelatu. Byonka byo baji muno bufuku bunu, kabiji ne suki yabo ya lukumo lwabaya, kabiji bamo na suki yabo ifita, kabiji ne meso afituluka, ne meso akifufya, kabiji baikala mu buwame bwabo bo bakekalamo.

¹²² Kabiji nobe nembu mukatampe byo aambile, “Vuluka Mulenga obe mu moba a bwanyike bobo, kimye moba atama kasa akyangye kufwenya pepi ne. Apo anweba kechi mukekalamo na lusekelo mwi abyo ne.” Byepi, Nkambo Yesu, Anweba mwaambile kwi Petelo mba, “Kimye kyo wajinga mwananyike, waimene ne kuya konse kowakebele. Pakuuba umvwe wakoma, muntu umo wakusenda ko ubena kubula kukeba kuya.” Balekai bavuluke, “Pano jino jo juba. Kino kyo kimye.” Kiswishai kye, Taata.

¹²³ Amiwa nakabila yense mwi abo, kwikala mwanami, muno bufuku bunu, ku yense mwana uji muno. Naketekela mba Anweba mwi babika mu maboko ami, mu kwibakeketela. Nebakabila bonse, kufuma kwi Satana ne kufuma kulufu, kuya ku Bumi mwi Yesu Kilishitu. Amena.

¹²⁴ Emupeshe anweba, baana. Kyawama bingi kwamba byambo bicheche kwi anweba. Kabiji Amiwa kabwela palutwe, Billy. Baana bawama, nemusachila. Mulongo Fred aye Nkambo akupeshe. Nkambo akupeshe, nyenga.



IYA, UNDONDELE AMIWA KDE63-0601
(Come, Follow Me)

Ino Mbila na Mulongo William Marrion Branham, yalupwilwe patanshi mu Kizungu pa Kibelushi mabaanga abufuku, Kapyatoto 1, 1963, pa Mbung'eno ya Panzubo mu Tucson, Arizona, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org